

Tracey van der Biezen:

Proyecto 'Ban Planta' di Fundacion Parlamento Hubenil Aruba a inicia!



ORANJESTAD (AAN): Di-aluna 3 di juni 2013 alumnonan di school Paso Pa Futuro a inicia actividad di planta simia di fruta y berdura riba e tereno di school despues di a haya aprobacion di cabesante Señora Zelda Steenen. E actividad aki ta parti di Proyecto 'Ban Planta' cu ta iniciativa di Minister Hubenil di Medio Ambiente, Tracey van Biezen, di Fundacion Parlamento Hubenil Aruba.

E meta tras di Proyecto 'Ban Planta' ta pa trece hofi di fruta y berdura organico na schoolnan basico den Oranjestad. Nos grandinan tabata custuma di tin un hofi na cas cu diferente fruta y berdura local cu nan mes tabata consumi. Cu tempo e parti di cultura aki a bay perdi. Pa conscientisa un ciudadano e importancia di planta mester cuminsa for di chikito. Cu orguyo mi persona, Tracey van der Biezen, Minister Hubenil di Medio Ambiente y alavez Presidente di Comision Medio Ambiente di Parlamento Hubenil di Aruba y conhuntamente cu Santa Rosa, Fun-

dacion Aruba Consciente y 'MiSimia' a inicia e Proyecto 'Ban Planta'.

E prome school na unda Proyecto 'Ban Planta' a worde inicia ta school Paso Pa Futuro. E aña escolar aki alumnonan di school Paso Pa Futuro a haya diferente les tocante matanan y por ripara e entusiasmo cu nan tin ora di planta simia. Primeramente e hobennan aki a haya un introduccion chikito di importancia di planta, por ehempel kico tur ta usa pa planta y con ta usa nan, door di Sr. Ludwig Rasmijn acompaña pa Sr. Randy Maduro di Santa Rosa. E practica mes a sosede den hofi di school caminda cu Sr. Urvin Leest di Fundacion Aruba Consciente y 'MiSimia' a guia e proceso di planta.



Nos a sinti un alegria enorme pa wak con grandi e interes di e muchanan ta na momento cu nan a ehecuta e actividad di planta simia di fruta y berdura. Nos ta spera cu den futuro e actividad positivo aki sigui engrandece.

Como Minister Hubenil di Medio Ambiente mi kier a expresa palabra di gradici-

mento na Santa Rosa, Fundacion Aruba Consciente, 'MiSimia', Andina Ice Industry Aruba, Flora Market NV, Bright Bakery, y comunidad di school Paso Pa Futuro pa nan apoyo y sosten. Un danki special ta bay na Secretaria di Comision Medio Ambiente, Srta. Jeaniree Bernabela cu a sostene ful e

proyecto. Tambe palabra di gradicimento ta bay na Coordinadora di Proyecto Señora Natalia Maduro, Stagiaire di Parlamento Hubenil Srta. Josey Burke y Directora di Parlamento Hubenil Señora Vicky Croes. Sin e sosten aki no tabata posibel pa realisa e bunita Proyecto 'Ban Planta'.